

詩

說

詩說序

吾夫子發明至理以垂訓萬世未嘗不援詩以爲證中庸大學義理之精微必以詩發之豈聖人之道皆有得於詩所以垂之天下萬世者必待詩而後信耶抑其作詩者皆聖賢之盛耶又況聖人因詩以推廣其義宏遠精

微皆詩旨之所未及洙泗之間諄諄爲學者
言未嘗不以詩爲先彼春秋諸賢執詩以助
其說者何啻千里之繆然後知詩之果爲難
言也似若六經出於聖人之暮年前乎此則
書藏於史禮樂存於名數易爲卜筮其公於
上下之所通習者詩而止爾故不學詩不爲

周南召南者皆不足以爲士誦詩三百固以爲多而有餘用所謂多識於鳥獸草木之名者特學詩之細事三千之徒可與言而終不與之言者賜與商而止爾聖人盖予人以共學而不予人以共知乃如此然則詩人之託物致意情旨幽遠不解其辭而求之於序序

之與詩文體升降遠不相侔託詩之名演而
爲義者多矣揣詩之義臆而爲說者亦不少
且以漢魏文章之盛辭旨淹洽未嘗有援詩
序之辭者惟東晉補亡模倣序義晉唐四言
皆循其法近世場屋命題乃以詩序同於正
詩儒先有欲去詩序者至其訓釋又多依倣

序意竟亦不能去也克之學詩似若於序無
預固未暇論其合與否也然序之出於詩人
或卜商或大小毛公皆莫得而準序之名氏
猶不可知況於詩乎詩之言辭猶不可知況
其旨乎然則言詩之難其人聖人豈欺我哉
其間又有甚可疑者焉按左氏傳季孫行父

以襄公五年卒不以壽聞者也姑以七十歲
爲準在僖公薨年纔十有一歲安有八九歲
之兒顧乃請命于周用前代未有之典出於
諸卿之右哉豳籥豳詩豳雅豳頌見於籥章
所掌說者乃謂盡該於七月之詩其然乎周
宣石鼓之歌審如退之所謂孔子西行不到

秦則祁昭之詩聖人嘗爲之折衷矣何所矣
而不編耶季札觀於周樂時則孔子之生二
十有六年矣其先後次第與今毛氏所傳無
絲忽少異是吾夫子終未嘗置繩尺於其間
也彼所謂逸詩者其逸於未刪之前耶抑逸
於旣刪之後耶聖人於詩纖悉必盡義有未

的則裁而正之辭有牴牾則刪而去之四始
主於文王黍離降於國風皆訓典之大法禮
義之大權非雅頌各得其所之謂乎嗟夫後
死者之於斯文欲如身親見之盛抑亦不知
量也已如以援證之詩言之則是經豈非聖
門之全書乎紹定壬辰十月信安劉克自序

家君所著詩說每篇條列諸家解而
繫己意於後其所纂輯家數視東
萊詩記加詳亦互有去取又以詩記
所編朱解乃文公初筆其晚年詩
解成時呂成公已下世更別為目
繫於朱曰之次書成歲在篋中有年
恨遭攻劫遺失數卷先儒固已各

有成書惟

家君所著未曾流布茲且以其說之僅
存者與書說對刊仍錄原本之副于
學宮或補為完書以泐後學則有望
於將來之君子淳祐六年人日迪功
郎郴州州學教授劉坦百拜書于
直舍

總說

自專門表章以後儒者之於六經盡心焉矣耳爲之訓詁爲之正義爲之集解使後之學者識所指歸此其所以配享先聖廟廷者也若魯論之何晏左氏之杜預范甯皆自之曰集解惟何晏併著姓氏固優於杜范矣近世之解經者盛於前古一經之說多至數百家要其發明之功能增益於先儒者蓋寡且聖人諄諄誨人以學詩良以其未易學也呂成公盡取諸家之說繫以名氏而謂之詩記其所特見則疏其後纂輯去取遂成其書參以前例皆得謂之

言部
言部
譔如蕭德施之於文選者也良由識見之得失學問之高
下皆於是發焉故纂輯之工得以居譔製之名然則詩記
其呂成公所譔歟

小雅之詩凡七十有四世傳毛氏之詩而六亡詩不與於
什附見於鹿鳴南有嘉魚之中呂成公依蘇氏更之六亡
詩得與於什遂有形弓祈父小旻北山桑扈都人士之什
而其次序則依六月詩序之文謂與鄉飲酒燕禮奏樂之
次皆合其果孔子之舊乎蘇氏之由庚崇丘仍毛氏之次
第者呂成公皆釐正之矣六月之序又果當時詩人之辭

乎是未可知也

漢之專門在詩雖有齊魯韓之異班固謂魯最近之恨未
獲見爾以諸家雜引驗之四家之詩不過音字與說之異
耳其刪次之本於古先者不得而異也

自古聖王以詩立教其形於聲歌播於音樂相告語於
學士大夫與天下之所傳誦講習者唯詩而已其必出於
聖賢盡於情性關於天下國家而後其詩傳焉自聖賢不
作吾夫子將使後死者得與於斯文列之於經而加刪定
焉一辭一義少有未合則從而折衷之如素以爲絢止以

先後之非次而刪之矣如豈不爾思室是遠而又以義理之舛而刪之矣如不忤不求何用不臧雖詩之所存已微其義不但以此進子路也如白圭之玷尚可磨也其能三復之者則任其兄子終身之託此又羣弟子學詩之實事也若子貢問荅貧富之說以迎解於切磋琢磨之語雖一時許以言詩而子貢實未之達乃於大學自發之由是以推豈非聖人終未嘗與子貢言詩乎

春秋之際諸大夫之歌詩皆今之所學也于時未折衷於聖人而諸國固已通習之矣似若出於詩人之所詠嘆傳

之其國傳之天下已若今之所謂經乎今之所謂經者未
必通習之也詩之在當時皆已傳誦習熟若後世之以詔
立是學者焉是公天下之所共學者皆詩也書藏於故府
易寓諸卜筮惟詩者學士大夫之所通習至吾天子而後
有所折衷春秋所歌皆不類者道散學失才質不足以有
知雖聖門猶難予言而況夫人乎此聖人所以諄諄誨人
以學詩者也

國風皆以國繫未有以義與人繫之者七月則以豳繫之
如邶鄘者也然則以地繫之則猶以國也惟二南不然以

南言則以義繫也以周召言則以人繫也說詩者大抵以分陝爲言分陝之說實不可盡據周官以三公爲鄉老則以鄉分也非若公羊所謂陝之東西也設若果爲分陝必在武王成王之後若文王安得有之如謂二南之詩各出於周召所分之地召南有召伯之詩周南未嘗及周公何哉二南皆文王之詩而有后妃夫人之異又何哉王化有淺深有終始繫之二公必有大旨要之周南召南則自有此詩已有此義矣義在南者南言王化也武王未勝殷之前不敢以王化自居託南以言化故鼓鍾之詩曰以雅以

南以簠不僭南可以並於雅矣簠者周禮之函簠也二詩
皆王業之基也皆簠師之所掌簠以函爲主興王之本故
也子夏所謂王者之風諸侯之風抑以后妃夫人爲詩序
故演爲此說耶然所謂先王之所以教若指大王王季爾
于斯時也召伯安在哉不然以先王爲文王則關雎麟趾
非先王矣此粗迹也猶不免於舛

二南之均爲大姒不可指爲他人決矣二南之首皆以鳩
爲比若豐鎬自有王睢其曰睢鳩亦鳩類也皆指大姒之
同於文王也周南詩辭自是天子之事召南詩辭自是諸

侯之事或者文王之爲西伯也風化之所形如此國人歌之矣迨其虞芮質成受命作周王者之制旣備應門臯門靈臺靈沼追王之禮上及后稷國人歌之文王之始終如此不可得而一也亦不可得而沒其實也以前日之詩別異於受命之後是以不容於不分蓋周之至德十亂之力也故以周公爲王者之風召康公相文武日闢國百里是以不容不以召公爲諸侯之風周公爲首召公次之欲繫之周公繫之召公理亦宜爾文王之詩王者之事不可以爲諸侯諸侯之事不可以爲王者遂以二南別之後世以

私說爲勝謂文王決不受命以小儒之見揣摩數千載之上事之窒礙皆以強辭勝之至於二南其說不通豈復顧計哉往往專以泰誓無文王之辭而武成有之以此爲證曾不思武成曰先王建邦大王王迹縱以爲出師告名山大川之辭豈有師未及商勝負未決倉猝軍旅中已備追王之禮如此但後世習見秦漢以後玉璽之說乃謂自堯舜以來皆若是雖不以此立論而大意似矣豈知三代之前以諸侯之歸爲受命之實堯舜之朝覲亦然克於書說論證甚多非若儒者偶見泰誓無文王之辭遂藉以亂聖

人之大典也

詩序曰憂在進賢不濡其色哀窮窮思賢才而無傷善之心者大氏模倣孔子樂而不淫哀而不傷之一語耳以孔子之意而觀子夏之言子夏失聖人之旨多矣其累闕睢也不亦深乎今觀二南之序大抵皆類子夏之文他詩皆然夫子既亡子夏老於西河西河之人疑於夫子當時之所尊事者視吾夫子不及焉是以果於自信贊亂聖人刪詩之旨後學因襲而不能自悟耳

二南立名之旨是有大焉者非深得文武周召一時王道

之太原未易可知也文武周公父子也而處亘古大聖人
會聚於一家之內其所形見必有大過人者自生民以來
未之有矣吾夫子發明取商一事旨趣甚深克於書說備
言之矣當時所謂至德者不獨文王一人有周公武王
是以其事如此醇懿魯論曰武王曰吾有亂臣十人孔子
曰才難不其然乎有婦人焉九人而已三分天下有其二
以服事商周之德其可謂至德也已矣何嘗專歸之於文
王是文武周公之外又有十亂共成此至德蓋一代之盛
節唐虞之所不及此吾夫子之所重歎也後世不足以知

此強以此事歸之文王而後吾夫子之旨大繆矣知此而後可以言文王之詩繫之周召者爲可推矣

南之爲言無他義也易曰聖人南面而聽天下鄉明而治義止於此文王之化自閨門以達之天下道化之行格於人心及於動植聖人之盛德也文王未嘗改物而化極於聖人之所難能故以南言之不以王化言而託之於南者臣事之節未改也不繫之文王而繫之周召者蓋所以共成周家之至德者二公之力故以是明文王之心焉若其詩則當時詩人之所歌詠而不可掩沒者也然周南之化

深於召南周南之旨大於召南其詩及於召公而不及於
周公者道本文王不以周召爲斷所以成周家之至德者
周召爲之冠固宜居之而不辭也

吾夫子謂伯魚爲周南召南者何也三百篇之多獨有取
於是蓋當時之可學者唯有詩而已爾二南者猶今世小
學之蒙求爾人而不學是宜其無知也猶小子何莫學夫
詩之意人而不爲二南則猶末之學也故曰猶正牆面而
立非謂二南能盡天下之理備爲學之能事也

介甫之辨二南似專以詩序爲斷而以詩辭證之此卽止

爲見理未明徇詩序而不知詩意耳若詳味詩意得明則詩序可略矣詩意本也詩序末也徇末而弃本可乎但觀召南詩序便似與詩意相遠若周南之序與詩意皆繆特甚但作爲文辭以夸之耳害於詩之大者也

言易者類以象數極其推演而出於易書之外言詩者類以名物極其推廣又出於詩辭之外皆儒者之深累也易之理義詩之旨趣終若銷蝕其有存焉者寡矣

詳觀詩序其間似若採詩中一辭以爲據而後之儒者遂依序之辭演而歸之於詩此固差舛之大者也今世類以

序與詩爲一人之言渾而同之愈遠愈差但見詩序之義之易通而詩人之旨不暇問也詩序顯而易見詩意隱而難知能通其序遂以自多又將以教人也惜哉惜哉

邶鄘衛之詩似以地爲別均之爲衛也其事則相參錯焉若二南則不然周南之風雖異於召南皆文王之時也係之周公召公者託之以爲別耳

詩序演文固後來講師之辭其支離者呂成公言之矣若美若箴若刺若疾亦恐非當時所書如世族在位相竊妻妾何等語哉使果有之豈耻言人過之義又有以證書而

述其生平行事皆若後人追述之辭然詩之爲追刺者亦鮮大抵臆而爲之說爾文之卑陋止似唐世文章未可望晉宋也

春秋諸大夫之歌詩若不與事類甚矣其不足以知詩也詩之不易知於是以詩序之易曉而求其旨而詩意遂大遠矣不足以知詩猶可略繆認詩意浸以訛舛流而不可返其害於詩深矣又不止如春秋諸大夫之失也

吾夫子之言詩大抵推廣詩之旨趣極於精微類出於詩人本旨之外豈害於言詩哉如許商賜以言詩皆爲其能

引而信之觸類而長之以切磋琢磨爲告往知來以素以爲絢兮之爲禮後其爲充類至義者也後之學詩固不可望遂以子夏能發詩旨之所未及至於理義皆馳則莫之敢議其何取乎學

詩人之作詩也固有不能言者不但託物喻意又加深且婉焉已若是矣猶有言外之旨存焉豈容自揭其不可形言者而爲之序乎其爲序者大抵子夏毛公於數百年之後名謚已彰事效已應然後有此序欲其聞聽不失意趣相契如之何而可哉若聽聞差矣意見異矣乃專以是言

詩其大相背繆不足多恠如魯文姜既謂莊公不能防閑
爲二國患又謂齊女賢而不取卒以無大國之助事之至
粗者差舛如此況其精微者乎

詩人之旨類不易知其物異也其言異也物有產於其地
而非他方之所均有言有出於方言而非異時之所通識
又況古今相去之遠哉今之訓詁有雜得於他經者有他
經之所絕無者雖以詁訓爲準而詩人之旨意殆未必然
說詩者乃若親見而耳傳之何也

予夏之在聖門學問甚淺所謂文學者非學也以詩序言

之其爲文固已隆於曾論他詩之序文體大較相似果使
皆子夏之筆然其論交而見詆於子張其喪明而見攻於
曾子曾子固晚成子張又有兩焉觀子夏終身未嘗少進
於道晚年遇魏文侯始尊而大之西河之人疑於夫子而
子夏亦亢然以言詩自命後世宗之莫之敢異豈吾夫子
之所折衷者哉況雜出於毛公諸儒之手乎

詩有自然之旨人不能精求之爾儻精求之則得之矣且
如人君之詩而詩辭乃以臣爲重便是所重在臣詩意在
福其間一二辭乃以德爲重便是所重在德若是者甚多

人皆忽之此詩旨之所以愈晦也

詩以情性爲主行乎禮樂教化之微者也蓋禮樂教化皆所以強其民也若其形於性情者惟詩見之情非所可強也出於一性之真者不能不發故於理義也常切近焉聖王取之以觀盛衰治忽之判故情之至者莫之可易治亂之兆常先見焉如大雅多言喜樂國風多言憂思而上之賢否下之好惡皆不可掩率出於自然而然此其爲義理之真實者乎三代之時自堯舜以來教化其民道德一風俗醇下多賢才必其至言確論而後傳焉天下皆通習之

矣孟子所謂詩亡者無復前日詩人之旨雖有存焉者寡矣夫是之謂之詩亡

六經之教肇於易信於書嚴於禮法於春秋凜乎不少恕所以從乎人情者詩而已爾人情者非所可強亦非可假最可以久長而共安之者也故凡經之所甚嚴者皆少寬焉諷刺箴規顯議隱訕闡閹之私昵家室之懽愛酒食燕樂之事憂勤勞苦之思皆於是發焉不少遏也然後以此觀政以此察民以此判治忽之幾明得失之理是以吾夫子之論道專以詩爲主而非學詩者所可預也

吾夫子之言自有微旨儒以其小者而弃其大者且如詩可以興可以觀可以羣可以怨邇之事父遠之事君其道富矣夫興與觀可以盡已羣與怨可以盡人五常之大綱也若是備矣此詩之道所謂雖多者也況又能識鳥獸草木之名是識鳥獸草木之名特其微者耳故末乃及之今儒者往往專以識鳥獸草木之名然後爲得詩之道其失聖人之旨多矣

近世之說詩者大抵以詩序爲宗凡詩之辭盡牽合與序同然後曲爲之辭使皆盡出於子夏之手則亦未折衷於

吾天子者也況其失浸遠乎

世之學詩先以詩序存於腹中安得不自障蔽雖欲不奪於序亦不自覺矣惟先去詩序深求詩旨得其醇一無礙皆已融暢然後看序始知序之所失爲多

文武周公肇造王業綱維道化類皆純懿精密要於極至夏商聖賢殆有未至者焉故仲尼論十亂之才上與唐虞之尤盛者並稱若又過之矣故其達之邦國臣民流行於事物政化皆不能不形見詩人作詩豈徇於言辭之末哉三百篇之旨可謂博矣其根原於立國之意者不過十

數太節學詩者安得不推本而參求之克於諸詩有合原
其所本者皆不容以辭之重複爲嫌以詩之本原皆同故
也覽者不詳其故而猷弃之其於詩人之旨安能數暢無
遺

總說終

詩說卷第一

信安劉

克學

周南關雎

國風

關關雎鳩在河之洲窈窕淑女君子好逑參差荇菜左右
流之窈窕淑女寤寐求之求之不得寤寐思服悠哉悠哉
輾轉反側參差荇菜左右采之窈窕淑女琴瑟友之參差
荇菜左右芣之窈窕淑女鐘鼓樂之

雎鳩之爲物其豐鎬間之羽屬乎豈必天下之所通有
哉鸛鵒之來巢于魯聖人蓋以爲異矣姑以羽屬言之

乃曰在河之洲猶黃鳥之止于丘隅也丘之與洲皆非羽虫所止所在之地也大學乃謂於止知其所止則知睢鳩爲得其所矣玩其爲在之辭不但如所止也河之洲左右皆河睢鳩不出於兩河之間而有速匹鳴聲上下之樂是興大妙之德幾同於文王天作之合盛德之粹如此其偶也詩人極於形容如此其微美是以爲三百篇之首文王之至德又先於四始者也河洲指文王也聖人於關雎之旨屢爲之嘉歎而不能已自漢以來諸儒皆莫之知夫以一文王之聖生民所未有而大

妣之聖又同之焉不但父子也而處此聖人所以深嘉
歎者也鵲巢爲召南之首維鵲維鳩亦並言之謂文王
太妣同其聖以此推之則此辭之爲並美可知也得淑
女以配君子如琴瑟之友鍾鼓之樂始求之如此之勤
終得之如此其樂是其次也盛德之至不可加者惟關
關雎鳩在河之洲一語而已若妃嬪之貞潔柔順如荇
菜之流之芼是又其次也嗟夫十亂在朝大妣在宮大
任在上此文王之所以聖歟此文王之所以爲至德歟

葛覃

葛之覃兮施于中谷維葉萋萋黃鳥于飛集于灌木其鳴
啾啾葛之覃兮施于中谷維葉莫莫是刈是漙爲絺爲綌
服之無斃言告師氏言告言歸薄江我私薄漣我衣害漣
害否歸寧父母

經傳之取義於葛多矣大抵取其蔓延比其根本無他
義也是詩雖言歸寧父母有本根之義而詩辭不及也
毛氏以覃爲延覃旣爲延則施爲何哉凡言施者皆延
也覃非可以延言似若是覃被覃及之義此蓋名詩之
旨不可略而諉之也詩辭亦以葛之所覃施于中谷爲

言之是覃自爲覃施自爲施后妃以柔順爲德取義於
葛若女蘿之施于松柏者也若是則何以能覃被於山
谷哉施于條施于木可也覃于山谷則不可以蔓延爲
言蓋超出乎尋常之外者矣故首章二章皆同辭詩人
之旨固不苟也所以繼關雎者也何以言之后妃以柔
順之德服習於宮壺之邃其所覃及乃至風化天下賢
才衆多王業以大國家以興此豈常情所可測度故當
蔓延之盛被于山谷葉之茂盛羽虫翔集鳴聲和暢者
若林木茂盛之所致而葛乃致之非所致而致焉明后

妃自宮室風化天下也而后妃之所服行者皆切近之
實事刈獲締紉澣濯節儉之煩辱爾此與文王卑服同
德卒章之言師氏又明后妃至貴而尊敬保姆不少間
於初年汙濔至末歸寧常情其可否不敢專必稟命於
傳姆而後行後世以華侈自肆者可少戒矣異時成周
之世惟王及后不會所以奉君上者如彼而文王之世
所以自處者乃若是其嚴恭也節儉蓋其細耳不可以
發詩人之旨

卷耳

采采卷耳不盈頃筐嗟我懷人寘彼周行陟彼崔嵬我馬
虺隤我姑酌彼金罍維以不永懷陟彼高岡我馬玄黃我
姑酌彼兕觥維以不永傷陟彼砠矣我馬瘠矣我僕痡矣
云何吁矣

是詩何其難知也說詩者姑以詩序求通於詩之辭其
所未暢則強爲之說似非詩人之旨去古既遠非有明
證亦不得臆爲之說但二南之詩皆樂易和平此詩乃
不勝其憂卒章乃有一吁不能盡者焉何也據詩序以
進賢爲說乃曰至於憂勤辭亦枝矣詳而思之聖人列

而次之於開睢葛覃之下必有大者焉以其時求之其
當殷之末世周之盛德耶當文王與紂之事耶殷周之
際其係於二代興衰之判者姜里一事韓退之謂臣罪
萬死兮天王聖明最爲有見大妙居此之時宜其憂之
至此也無一毫怨懟其上之辭其所可證者詩人以淺
辭致微義皆以彼我二字見之詩人之法類如此此詩
首所著見其言彼之危岌者皆以發意明舊鬼之勢也
玄黃卽龍戰之血也兕觥罰觴也因彼而酌此酒勿永
以爲懷勿永以爲傷其旨著矣硯者藏至岌之執歟不

可知之中僕馬皆病云何吁矣不可得而言亦不勝其
可歎也此章非爲姜里發何哉當橫逆患難之時太姒
惟憂傷歎息而不敢言不敢怨其情如此所以采采卷
耳而不盈頃筐者也觀詩人憂歎如此則史謂閔天之
徒求美女奇物善馬獻之紂者庸或有之宮壺之中其
憂也壹此大姒之所以爲聖歟

樛木

南有樛木葛藟荒之樂只君子福履綏之南有樛木葛藟
荒之樂只君子福履將之南有樛木葛藟荒之樂只君子

福履成之

樛木之義他不見於傳記其歧雍之所產歟毛氏之訓其以詩序而生此義耳求之詩辭亦無此旨止於葛藟之蔓施不在木也故榮陽公有不取其木之言竊詳詩辭與大小雅相近歌詠其福祿爾和平樂易與前詩憂勤之旨遠甚詩人以木爲興其辭曰南南二南之南也於周南之詩而以南爲辭謂非詩旨不可也其文王受命作周之詩乎木之曲直其性也文王之王而屈於商紂有所服事而不得伸此詩人所謂南有樛木也木雖

有所屈而天下之所依係於周與周人所以尊事而主
之者自固結而不可解故首章曰纍之猶纏綿也二章
曰荒之荒大也與文王荒之同辭卒章曰縈之不可而
解也首章福履綏之綏安也福之所安受也二章曰將
之將大也卒章曰成之王業至此而成也履訓祿其然
乎後世襲之不以爲疑實與祿相遠且不類蓋履禮也
上天下澤履文王雖受命作周猶以三分天下之二服
事商紂上下之分固存克於書說辨其受命之後商自
爲商周自爲周若二國然故商王周王並稱而不嫌所

以然者周之友邦尊事之心與庶商諸侯自不可得強
同也故當時詩人以福履言之所以始安而中大終成
之手

螽斯

螽斯羽詵詵兮宜爾子孫振振兮螽斯羽薨薨兮宜爾子
孫繩繩兮螽斯羽揖揖兮宜爾子孫蟄蟄兮

春秋之書螽者十有一其以爲災也審矣周南乃以興
后妃之美何哉春秋以其多而害稼詩人以其多而爲
子孫之衆其義異也詩辭以其羽之多然以其義詳之

非若百足之虫也螽止四羽所謂蝗者亦止四羽非曰羽之多蓋類之多也詩人取其蕃育之盛爾周之以宗強其本原在此鍾管蔡之惡幾亡其宗國周公之大封同姓以蕃屏周晉與吳訖周之世八百年豈非螽斯之澤歟以詩人之旨求之大要是樂得淑女進御於君大妣一以母道均一之不見其爲嫡庶之異其爲聖賢不才不能比而同之而大妣所以子愛之者本無間故但見聖人之多男子而周家本支之盛如此此之所以螽斯爲比也斯辭也非義所起其曰宜爾子孫者人皆知

其爲后妃之子孫莫別其爲嬪御之子孫故詩人以螽斯一之以宜爾歸本大姒如陳氏所謂歸其所自於后妃者也若不妬忌雖爲婦人之難事任姒之聖豈應以常人之情言之此序詩之辭不當以混詩人之旨也

桃夭

桃之夭夭灼灼其華之子于歸宜其室家桃之夭夭有蕢其實之子于歸宜其家室桃之夭夭其葉蓁蓁之子于歸宜其家人

是詩如孟子大王愛厥妃之言當是時也內無怨女外

無曠夫與百姓同之者也若是則不必歸於后妃之
妬忌可也文王之時自無窮民詩人但見岐雍之民熙
熙如此夫婦各安其居室其氣象如春風和氣中因挑
天而發興焉爾

兔置

肅肅兔置椽之下丁赴赴武夫公侯千城肅肅兔置施于
中達赴赴武夫公侯好仇肅肅兔置施于中林赴赴武夫
公侯腹心

兔置與武夫扞城皆不相類借曰託興不應若是遼闊

也故朱氏謂聞柝杵之聲視其人則甚武可以扞城正以其事之不類爲此說以通之爾詩人之旨必有所在儒者自不思爾竊意詩之三章自柝杵至中逵中林此詩旨之所寓也兔狡者也其爲三窟豈當行道之中哉捕之者設置於其窟之近地自中路至中林如此其多也喻狡焉思啓封疆者狡捷倏忽多爲之所而不窮其窟穴以爲利此聖人固圉之至心也此文王所以待昆夷獫狁之道常扞蔽於平易近郊之地初未嘗搜荊棘窮窟穴求盡其類豈非聖人待夷狄之常道乎故其

夫之赳赳未嘗恃此以信威始之扞城中之好仇與夷狄雖仇敵而未嘗不以好接之不殄不墮之意至於歲行境外遠人之服乃以武夫爲腹心以保乂王家共享太平之福此兔置所以爲周南之詩歟

宋曹

采采芣苢薄言采之采采芣苢薄言有之采采芣苢薄言掇之采采芣苢薄言捋之采采芣苢薄言拮之采采芣苢薄言擷之

芡草莫詳其的爲何草也陸璣所謂難產者亦恐揣摩

詩旨爲之說耳今方書治產不用車前子也然則詩人之旨且終不可解抑歧雍所產非他方所有乎然則聖人取而列之周南若未見其可美也何以爲正風之大乎似若諸儒但述詩序之辭不詳求詩人之旨也詩人之旨不專在采芣何以明之曰采曰有曰掇曰捋曰裋曰瀨一詩之辭如此而已故采芣之上必加以采采二辭以婦人比采芣則所以采之者非婦人也詩人之旨若謂婦人無全善也色非所尚而尚其德苟有一毫之可取后妃皆取而進之矣此寤寐求之之遺意也關雎

之永淑女至於寤寐不忘輾轉反側凡淑美之德有可
取者取之不容絲毫遺失矣是以采采之辭不輟而薄
言之辭各異詩旨之寓於采者蓋寡

漢廣

南有喬木不可休息漢有游女不可求思漢之廣矣不可
泳思江之永矣不可方思翹翹錯薪言刈其楚之子于歸
言秣其馬漢之廣矣不可泳思江之永矣不可方思翹翹
錯薪言刈其藁之子于歸言秣其駒漢之廣矣不可泳思
江之永矣不可方思

詩之難知此詩是已道見游女將秣馬以從之此鄭
衛之變風何以爲二南乎說詩者遞相祖述而不知
其非止由序詩者不知詩人之旨所能知者漢有游
女一句便執以起義後世儒者尊信太過不復致思自
游女一辭之外他皆枝離其辭以從之矣曾不知岐雍
之去江漢幾萬里而遙藉曰道化流行何獨踰越疆理
獨取江漢爲辭周召分陝亦不至是他詩未嘗近似也
惟江有汜託江汜以言嫡媵爾非若江漢之指也然漢
水與江小大相遠當時依漢水以爲國者惟荆楚爾左

傳所謂漢水以爲池是也漢之視江未爲甚廣詩以爲
名蓋言漢之廣以明其不可泳爾詩凡三章章之末皆
同辭不少異一章以喬木發辭二三皆以錯薪發辭此
其旨也游女止是首章之一句安可以盡一詩之義乎
首章者詩人之本旨也似若喻楚之強悍驕亢不能
民故以喬木不可休息喻之薪比當時諸侯文王其傑
出於諸侯之間者也故言錯薪附近楚國者皆陰邪游
蕩之人不能應民之求故以游女不可求比之見文王
之興思將去江漢而歸周而不可得也言其不可則知

楚之暴虐域民以封疆之界如此其嚴也是以三章之
末句不少異見歸周之至切漢水雖非大浸詩人以為
至廣矣一詩之句凡二十有四言不可者八焉楚去岐
雍之遠猶若此當時諸夏之願歸于周者可以觀矣

汝墳

遵彼汝墳伐其條枚未見君子惄如調飢遵彼汝墳伐其
條肄既見君子不我遺棄魴魚鱣尾王室如燬雖則如燬
父母孔邇

是詩自是商邑之民思歸于周之詩汝水疑是周境伐

其枚筴庶幾想像文王而願見之也伐其木之枚不
蔽於所見故首章如飢餓二章望文王不以商周爲異
而棄我也三章以文王爲民之父母矣詩辭以彼我爲
別故知其爲商人之辭

麟之趾

麟之趾振振公子于嗟麟兮麟之定振振公姓于嗟麟兮
麟之角振振公族于嗟麟兮

麟非實致之祥非若魯哀西狩之獲也有文王之公子
公族公姓雖不果致麟不失爲聖人在位之盛魯哀之

際雖真致麟聖人蓋以爲不祥矣當文王時麟不實至
何以知其趾之爲仁厚聖人者必知麟詩人以麟趾歌
之吾夫子列之二南踰於麟之爲祥也多矣雖然甫之
興定豈不重於趾詩人以趾名詩趾豈貴於角乎蓋麟
之至也以足文王之世多賢公子詩人取類謂其賢之
多也詩人大旨以麟興文王李氏之說信也何以證之
其下文曰于嗟麟兮歎美文王之在上也一聖人出而
興於上而公子公姓公族皆爲大賢詩人歸其本於文
王太妙故以終周南之什而爲之重歎焉

召南鵲巢

國風

維鵲有巢維鳩居之之子于歸百兩御之維鵲有巢維鳩
方之之子于歸百兩將之維鵲有巢維鳩盈之之子于歸
百兩成之

詩人以鳩鳩比夫人以鵲巢比國君詩序則以鵲巢爲
夫人之德後之說詩亦混鳩鵲而言夫人曾不思詩人
以維鵲維鳩並言謂太姒與文王同德也詩凡三章維
鵲之辭不異維鳩之辭不同自御而成自居而盈始末
之序其興夫人必然也不可以他辭亂之也鳩之均壹

鄭氏之說似非詩人之旨詩人之旨若謂鳩者呼婦逐婦之鳥有婦道焉後世詩人所謂鳩婦也詳觀羽虫未嘗混處鳩自能爲巢特拙甚爾抑歧雍有居鵲巢者乎惟杜宇寄巢生子爾鵲巢比國君而居召南之首亦猶關雎之首國風也亦四始也鵲旣比國君是不以鵲言夫人矣何以名詩而首召南乎頌夫人而首召南可也文王自西伯興周而受王命鵲巢之詩作於文王初載天作之合之時造舟爲梁故有盈之將之之詞周之王業自大任以聖德興周而大妣嗣徽音以至於關雎之

歌后妃者其淵源有自來也有文王之聖而後大妣之德以成所謂刑寡妻者皆自文王出焉此鵲巢之所以名詩而不以鳩鵲者也詩人之旨終自精微非常人所能及耳太妣之聖未嘗有所作爲而以拙享有成業致興周之盛是婦道之不貴於作爲如此此可以爲萬世法文王有其國家不以宮壺之事分其念慮內教陰德一出於大妣以造其極至此所以鵲巢名詩而首召南者也

采蘋

于以采芣手沼于沚于以用之公侯之事于以采芣手澗之中于以用之公侯之宮被之僮僮夙夜在公被之祁祁薄言還歸

此詩似若周人歌詠大姒共祭祀之詩先祭之時具祀事如此其蠲潔也二章共祭祀如此其專壹也末章共祭之容如此其雍肅也迨其還歸其盛德之容猶有可尚如此詩旨簡直醇濃而大姒之德如文王肅肅在廟之時睟然之容視采蘋爲有間矣

草蟲

嘒嘒草蟲趯趯阜螽未見君子憂心忡忡亦既見止亦既
覯止我心則降陟彼南山言采其蕨未見君子憂心惓惓
亦既見止亦既覯止我心則說陟彼南山言采其薇未見
君子我心傷悲亦既見止亦既覯止我心則夷

此詩似與殷其雷相近此乃先焉者無怨懟也當文王
與紂之時文王爲西伯固以急民爲己憂矣周公謂曰
具不食且不敢盤遊故召南之大夫亦以文王之憂民
爲心不暇念其家室其妻念其夫以一見之爲難既見
之以一遇之爲難曰見曰覯則大夫之勤勞不遑寧處

之情悉見矣南山以南爲義蔭微以養爲義不敢直言
之者見文王憂民之深而未以民爲己任故召南之大
夫任君之責隱然有至難者焉非若殷其雷以違去之
爲辭也

采蘋

于以采蘋南澗之濱于以采藻于彼行潦于以盛之維筐
及筥于以湘之維錡及釜于以奠之宗室牖下誰其尸之
有齊季女

采蘋之言簡而事尊采蘋之言詳而事卑詳其義玩其

辭序詩者謂此詩爲大夫妻其得之矣大夫之家且其
於諸侯之廟制也則是詩者得於召南之從政者亦足
以見文王時大夫之家事亦雍雍濟濟如王者之盛時
被之歌詩二南之餘風如此也蘋藻非可食之菜不可
食則亦不可薦詩人乃取以爲言何也明其至潔也託
於至微也微者猶若此則牺牲俎豆如何其蠲潔如何
其詳謹也此詩人之旨歟積而上之則視滌濯蠶絲祭
服之事皆不必言矣

甘棠

蔽芾甘棠勿剪勿伐召伯所茇蔽芾甘棠勿剪勿敗召伯
所憩蔽芾甘棠勿剪勿拜召伯所說

言召伯詩辭當文王爲西伯時使召公果分陝亦得稱
伯乎若凡伯榮伯者天子之卿也是詩若後世追頌之
辭思召公嘗聽訟於甘棠之下而愛其樹故以召伯言
之以其分掌諸侯也後世採詩者崇異之次於夫人之
後併以行露次之焉詩二上有五詩皆室家之德惟
兔置甘棠行露羔羊詩二上其自參於風化之盛比物而有
取於甘棠崇以甘言詩二上實紂之事亦猶后來其蘇

之情被文王之澤如此其甘也召公以文王之仰聽訟
于南國亦大國之卿也而舍三樹下東漢之初光武初
興馮異不論功猶屏樹下人號大樹將軍當武人征伐
之時猶以止樹下爲賢況以君命聽民訟乎其視暮宿
州縣逼辱守宰何相萬哉

行露

厭浥行露豈不夙夜謂行多露誰謂雀無角何以穿我屋
誰謂女無家何以速我獄雖速我獄室家不足誰謂鼠無
牙何以穿我墉誰謂女無家何以速我訟雖速我訟亦不

女從

是詩之辭其取義多不以其類誠有深遠而難通者焉
說者強爲之說以通之欲其該貫無礙安可得哉誰謂
雀無角是謠言其有角也誰謂鼠無牙則誠有牙矣安
可得而一之速獄速訟與有家何預乎若說文及楊氏
皆言鼠無牡齒也今牛羊唯下齧有牙頰車無之是以
唇之附者爲牙政與詩旨相似而左氏又謂脣亡齒寒
是以附脣者爲齒也此皆相因而名皆以轉移義不在
此也鼠自胎息前二牙已具故嚙物爲尤利以鼠爲有

牙而雀不可以爲有角明矣謂雀有角甚於童而角也
此所謂不以其類者也竊詳此詩凡三章言聽訟後二
章言獄訟之情其旨甚明露非可以行言行露者行而
沾露者也當文王之初紂在上虐被於民商俗之弊以
蕩陵德實悖天道怙侈滅義驕淫矜夸召公奉西伯之
命聽訟於民德澤所加止於行者而已其不行者與行
而不至者不能及也故其澤物如行人之沾露不能如
雨露之普澤也獸泥言露之沾濡豈不夙夜謂行者豈
不早夜而行乎所行之及者潤澤已多其不得行者勢

不及也當是時文王日昃不食求以和民猶勤勞若此
召公爲之輔相宜其夙夜而行也二章雀非可以角言
雀鼠以至微之物其害於人尤切謂姦宄之興常橫出
於無端如雀本無角其於有角屋簷以庇風雨而雀乃
穿之使人不能安其室家猶姦宄妄起獄訟使絀縲於
獄不使可安也鼠有牙者也鼠之有牙雖墻之厚亦
必穿之猶姦宄也謂訟之橫起不可通者亦通之出於
意外者也此形容姦宄之情者也所不易知者後二章
之六句耳此亦不以其類者也詩人之旨謂獄訟之起

不過兩端威富而已故呂刑曰典獄非訖于威惟訖于
富墨家不足言絕于富也亦不女從言絕于威也經傳
之言不足者皆不斥用之意猶百姓不足君孰與足非
若世俗言人情之睽傷謂之不足也以此推之詩吟之
辭皆以其類特難知耳經傳之言獄訟不少惟此詩盡
形容之妙乎凡詩自淺入深者甚多自深入淺者極寡
此詩訟淺於獄也雀以角言理之所無也鼠以牙言理
之所有也理之所無而曰穿屋事之常也理之所有而
曰穿墉勢之非常者也亦皆形容姦究之情也獄以究

其隱情訟以伸其可直者也興獄以徼利興訟以爲僞故有不足不從之異序詩者模倣二章之意謂興獄以徼婚何其遠哉

羔羊

羔羊之皮素絲五紵退食自公委蛇委蛇羔羊之革素絲五紵委蛇委蛇自公退食羔羊之絳素絲五紵委蛇委蛇退食自公

詩辭兼取素絲詩名專主羔羊合而言之實羔裘也詩名不以裘言獨以羊者非謂裘也凡言羔裘者必有飾

羔羊之詩不以其飾也義止於羔羊也裘所以爲飾如
羔裘豹祛緇衣羔裘皐皐也今無取其飾曲禮云凡裘卿
羔大夫鴈士雉鄭氏謂羔羊群而不失其類此名詩之
旨歟名詩以羔羊而解則爲裘素絲所以製羔羊之皮
以爲裘五紵五緇五總以素絲爲之純於潔白者也純
於潔白而絲毫無所累焉若李氏所謂不當不鳴之義
皆備所以進退之間綽綽然有餘裕雍容自得之意退
以就公可也由公事以退食亦可也表裏無所累其心
與賢之和如唐虞之際可謂盛矣以節儉正直爲言矣

乃少異乎詩三章皆以退食爲言詩人之所主然也羔
羊素絨皆言潔白之純也卿大夫之潔飾於其外猶或
難信惟於退而燕私亦有雍容之意則非強勉矯飾之
爲也所以申言之

殷其雷

殷其雷在南山之陽何斯違斯莫敢或遑振振君子歸哉
歸哉殷其雷在南山之側何斯違斯莫敢遑息振振君子
歸哉歸哉殷其雷在南山之下何斯違斯莫敢遑處振振
君子歸哉歸哉

雷者驚遠而懼邇雷之出地萬物甲拆之始易之卦爲震其象爲龍詩人乃以其聲之類名詩何哉得非當文王與紂之事乎文王爲天命所歸而紂居其上猶陽春萌動於南山之下也南者君之南面嚮明而治者也其取義之備未有若此詩者也文王有憂世之心求以咸和萬民而紂居其上文王不得大行其道而大夫之贊化者亦不得自止於行室家之人思欲其夫遺而去之此婦人之仁也若召南之大夫與文王同心同德則亦如雷聲之動不容自止於行役之勤也

標有梅

標有梅其實七兮求我庶士迨其吉兮標有梅其實三兮
求我庶士迨其今兮標有梅頃筐既之求我庶士迨其謂
之

是詩美男女及時其果足以爲道化之盛乎勾踐一令
之頒亦足以至是文王之時無鰥寡孤獨之窮民者西
土之民皆不至於無告豈以是爲可美歟詩人之旨以
文王盛時道化之純格於閨門之遠雖女子之微亦能
安於閨闥當婚姻失時之後猶以禮節自守不輕有所

從三章皆以梅之標喻婚嫁之失時以求士喻女子之
未有行不言男之求者道化以格於女子為難也天下
之治雖婦人女子皆有風節天下之亂必淫風大播而
後禍亂遂成故鄭衛之風興西漢備書諸王之淫亂其
垂訓之旨一也此詩首章於庶士之中追其吉審所擇
矣二章追其合者為三章起義於急之中必追其甚且之
合訖不以從之為辭是強委禽而不得者也此詩人所
以形容道化之格出於女子之自定非父母保傳之所
能及也按邶柏舟宿辟有標毛氏曰標指心兒由是推

之標非可以落爲訓字亦從手以栢舟推之殆太息之意太息梅之所存已不多天故曰標有其有者亡有者三而已既則盡矣

小星

噤彼小星三五在東蕭蕭宵征夙夜在公寔命不同噤彼小星維參與昴蕭蕭宵征抱衾與綯寔命不猶

星本不可以小大言均爲二十八宿而有小有大有明有晦有隱有見未嘗以此異其義乎小者爲常亦三星也至大者爲參伐星家謂之大辰乃不言者義不在此

詩人名詩自有旨也本不持言某星也噤微見而曰三五在東白初昏星初見三五數點見於東方至夜而漸進而南故曰肅肅宵征參昴當昏時亦甚微比女御之進見易所謂貫魚以宮人寵者魚貫而進如星之宵征雍雍肅肅文王宮室之遽如此其嚴肅也亦繼於帝舜釐降之時以命爲貴賤之命者後世之俚辭也古者安得有此堯以二女妻舜舜不以姊妹之故使之離也猶爲之分別書謂之釐降離騷曰湘君湘夫人春秋時諸侯嫁女同姓媵之媵與夫人貴賤定矣豈以是爲歡乎

知其命有貴賤後世之末習也安可以涸詩人之正理乎此詩所謂命者分位之命也以其命爲不同者言之常誼詩人以明文王宮臺之粹此所以能言貴賤

江有汜

江有汜之子歸不我以不我以其後也悔江有渚之子歸不我與不我與其後也憂江有沱之子歸不我遇不我遇其嘯也歌

以詩之章次言之睽之淺者合亦淺睽之深者合亦深乎此又詩人歲時音義深淵之始不宜戚戚也

有死麕

有死麕白茅包之有女懷春吉士誘之林有樸楸野有
死麕白茅純束有女如玉舒而脫脫兮無感我悅兮無化
老也吠

說此詩者似若以死麕況強暴以白茅況貞女無使老
吠爲惡無禮諸儒所以祖述而不能異也以詩辭求之
大抵皆室以死麕爲強暴曷爲包以白茅乎故王氏謂
白茅爲禮之薄豈理也哉旣以死物爲可惡曷使老之
吠乎囿於序詩之辭不求詩旨焉爾古者不以死爲惡

也帝舜以一死爲贄見之禮者雉也禮以狐死正丘首
爲仁皆以死是義據此詩麇鹿亦乾豆之物上殺以
上帝宗廟鹿脩以祀天豈非白茅之所包乎大過之
六曰藉用白茅孔子曰茅之爲物薄而用可重也
慎斯術也以徃聖人之言豈自相背戾乎由是推之
詩兩章以女與死麇死鹿並言非以死物爲可惡
是以包之束之以白茅其爲況吉士其明所以託辭
死麇者謂女子貞節處於林野之中有死無二
吉者求之所以自處者愈固故曰包曰束也

所服舒之者繼包束而言舒其所包也悅不可感老不
可驚況於人乎詩人形容貞女之自勵者殆有蠶之
聲不挫其精者焉此所以爲二南之化乎無感我悅猶
舉扇障塵也無使老吟猶獬豸觸邪也林猶大姓也樸
櫟猶賤家也家無小大而貞女之風皆有不可干之節
何彼襮矣

何彼襮矣唐棣之華曷不謂雖王姬之車何彼襮矣華如
桃李平王之孫齊侯之子其釣維何維絲伊緡齊侯之子
平王之孫

名詩之旨若與變小雅何人斯相近皆以設問名詩也
設問者有不盡言之意是詩似若見王姬之車倏然而
起崇敬之心西土之人尊崇文武未施教於民而民敬
故以名詩又以曷不肅雍爲辭蓋是王姬下嫁國人觀
其車服尊敬之心油然而生見於歌詩殆與文王已受
命者無異其列之召南之末者見此時文王之功德已
爲南國之所推尊其視周南后妃之化若相似然也

騶虞

彼茁者葭壹發五豝于嗟乎騶虞彼茁者蓬壹發五豝于

子騶虞

騶虞之爲義獸其可信乎使誠有之抑亦恠矣聖人之
所不語也況編之於正風乎然天下固有出於常情之
外者近世廣中一郡虎患甚熾忽有所謂神禽者飛而
啄虎羣虎皆盡守臣繪以爲圖以爲大祥以此推之庸
或有焉不敢輒以爲無也但以詩辭推之則似不然于
嗟乎騶虞是指一發五犯爲騶虞之仁也如以爲義獸
豈有一發之理哉黃棟謂騶爲徒御之騶虞爲山澤之
虞明矣當蒐田時庶類蕃多一發而得五爲騶虞者乃

不以多取爲利詩人所以歎美之騶虞以多得爲利也
猶若此見文王之化行於小夫賤隸不要約而信也宓
子賤之化單父猶能使夜漁之格況文王之時乎此理
甚正而順亦聖經之正誼也

成化丁未七月十九日雨過新涼梨人間開半
鉤三日後復過觀一過因書以紀歲月云覽

詩說卷第一



詩說卷第二

信安劉克

邶風

栢舟

汎彼栢舟亦汎其流耿々不寐如有隱憂微我無酒以
教以遊我心匪鑒不可以茹亦有兄弟不可以據薄言
往愬進彼之怒我心匪石不可轉也我心匪席不可卷
也威儀棣棣不可選也憂心悄悄愠于羣小親閔既多
受侮不少靜言思之寤辟有悖日居月諸胡迭而微心

之憂矣如匪潞衣靜言思之不能奮飛

三衛之次于二南而先于王風儒者略之何哉據詩
記引鄭氏詩譜言邢鄘衛皆紂畿內之地武王封武
庚為殷後三分其地置三監南謂之邢北謂之鄘東
謂之衛成王既黜殷命伐三監更置三國建諸侯以
殷餘民封康叔于衛後世子孫并彼二國混而名之
衛政衰變風作、者各有所傷從其國本而異之朱
氏曰必存其舊號豈其聲之異歟然則三國之說亦
莫明其所以異也況能知其次二南而先于王風乎

克以書致之周公伐三監之後至康王之世四十餘
年天下雖盡為周末嘗一日強名其臣民以為周也
止曰商士商民者不奪其忠于其主之意遠在成周
者三后治之存于商邑者康叔治之康叔所治制于
酒明于罰者皆以商民漸惡之故此其見于書者也
以類推之康叔因其地與民必將如成周表宅里殊
井疆者為是以為邾邠也若馴而何化者則為衛、
則周同姓之國王宣之民也邾邠之終始乎商民者
周家亦不強而一之于衛也此聖人之所以為不可

及亦猶書之終始乎商士詩之殷士庸敏祿將于京
欵吾夫子既詳之于周書之序是以于詩祇以邶鄘
列之而義自見今據其詩言之所謂淫亂者皆邶鄘
之風于衛不預也衛有康叔之化已革而從周者也
書之言商俗詳矣未嘗微及其淫亂邶鄘不率而有
奇佻之餘風故末汎大為淫亂宜不可混而同于衛
也然邶鄘淫亂之風多衛之公室也非皆民風蓋君
有道則能以上率其下君无道乃以上而化于其下
聖人原其所自来故以為邶鄘之汎化而然非若竹

竿河廣有不變之節也周公既不強一其民以為周
是邶鄘之為商猶前日之世吾夫子豈將不承其法
而少寓不臣先代之意是以列邶鄘于衛上併次于
二南先于王風者用存商之盛心也何以証之曰邶
鄘寔統于衛周封國之制也今詩以邶鄘先于衛者
不臣先代所以存商也此吾先聖刪詩之旨也且邶
鄘之栢舟皆二國之風尚不可混况于衛乎邶鄘首
篇皆以栢舟為興義宜不相遠檜栢松均也獨取于
栢者豈離騷香草之義乎首篇宜有大旨而他詩附

鳥者也先儒皆未之及訓詁所不及其可臆也據率
我之言松柏栗皆木之堅久者也二詩之旨亦略相
似得非堅久之義乎味其詩碑前邶風五篇如出一
人之手皆莊姜之詩也後世但以慍于羣小一碑遂
以仁人不遇小人在側起義若是則與潞衣卷轉遠
矣莊姜不見谷于衛君莊姜賢而文故志節不回碑
多嘆息首章汎舟人汎之也汎一汎之汎也委身于
勢不可得而為也憂之深非酒之所能銷也二章鑒
取其自明兄弟取其義絕而无助歎慍而橫被譴也

三章言守節不回以禮自謹而已四章言嬖寵之終
憂且忿也五章言日月易久浸漬之深以大明之光
浸已微滅而不見察此即與日月之詩乃如之人兮
指州吁同緯我身如不濟之衣被以汙濁而不可解
免憂憤之情而不失其正閨門之美行也是以為三
十九篇之首歟

綠衣

綠兮衣兮綠衣黃裏心之憂矣曷維其已綠兮衣兮綠
衣黃裏心之憂矣曷維其亡綠兮絢兮女所治兮我思

古人俾元就兮締兮綌兮縷其以風我思古人寔獲我心

竊詳禮服未有以綠為衣者惟綬則用之亦下體之背也本以為綬而今為上體之衣所以喻州吁之母上僭之甚也故前二章皆曰綠之不可以為衣也綠既為衣則黃中之色不容下降初降而為之副所謂裏也再降而為之下所謂裳也三章反覆以綠為言見名詩之旨矣自咎其馴致此患非他人也我不能正其色于未染之始今但當以古人自力使不得

而加喙

俗于淒風之時固不足以禦寒矣
自強不改其度此我中心之所存
之道乎莊姜之文之德其懿矣乎所
嘆也使其望之乎清明其序以正主妾
微矣莊姜之心蓋不以此衛武公在位
雖義存于詩衛人所謂睿聖武公者也莊
似內嬖之盛以蓄州吁之禍莊姜之處此
人之賦見美于國人而已其憂州吁也
王政不行庶孽之干嫡以敗國

限何如其

癸立之載書

之極聖人列此

所聞世其于嫡庶之亂國逃而不亡其存
而正之首止之會

邯鄲之風淫亂

之子于歸遠送于野瞻望弗及泣
之頃之、子于歸遠于將之瞻望
于飛下上其音之子于歸遠送于

南瞻望弗及寔勞我心仲氏任只其心塞淵終溫且惠
淑慎其身先君之思以勗寡人

是詩之為莊姜送戴嬀以左氏所書言之辭旨皆合
其所可嘉莊姜以正嫡名戴嬀之子完、立而見弑
戴嬀與福後婦于陳莊姜以正嫡與戴嬀相與如一
觀差池胡頎下上之辭如二夫人然不以嫡自居如
此觀塞淵溫惠淑慎之辭戴嬀之賢亦足以上比莊
姜衛莊公室 盛如此莊公不知所以處 之
使嬀寵其 莊姜能以節著以文鳴以順勝蓋一

時之盛美也

二 嬀之可歸而莊姜之能立者求之于

詩而可見何

詩以燕者去來皆以社

人

詩人謂戊日燕重來常與鴻相避燕因時而歸者隨時者也謂桓公死戴嬀不得而安也莊姜夫人居正嫡之位不得而去也卒章曰先君之思以勗寡人若所謂寡小君以先君而自勉不以禍難為可免也此詩人之旨歟若以詩序歸姜之緯而欲廢公羊毋以子貴之義則亦何取于儒哉

日月

日居月諸照臨下土乃如之人兮逝不古處胡能有定
寧不我顧日居月諸下土是冒乃如之人兮逝不相好
胡能有定寧不我報日居月諸出自東方乃如之人兮
德音允良胡能有定俾也可忘日居月諸東方自出父
兮母兮畜我不卒胡能有定報我不述

是詩四章皆以胡能有定為辭每章之發語不同此
言皆同者詩人之本旨也以左傳所書攷之正與此
合州吁弑桓 而立不能和其民國人皆將 一夫
州吁之與石 比而求定其位者允遺慮焉其告于

宋請伐鄭而陳蔡從于是宋衛陳蔡伐鄭秋復伐之猶以未能和其民為憂則州吁之不能定其其急甚矣石碯結其子使朝陳以請覲者因其急而使之親其仇也陳固戴嬖之見逼而往歸之國也陳之從于伐鄭其情未可知其戴嬖之歸必仇州吁者也州吁如陳以求定其位急而不暇顧謂陳衛方睦嘗從我伐鄭而不見仇也于是石碯之智伸矣以此觀之則莊姜此詩之旨坦然言辭皆曉暢不待強為之說也日月名詩者猶非一朝一夕之故弑逆之漸有

自来也首章言莊公在位宜照臨其奸慝也乃如之
人指州吁甚明安有指其君若此之輕乎逝不古處
謂嫡庶之分其失已久州吁在位莊姜君母也寧不
我顧不顧其有定也二章言莊公在位足以覆冒一
國州吁自始固不相好矣三章德音無良國人疾之
也俾也可忘寧使之忘我也報我不述者謹浪笑傲
不可稱述也若日月之出自東方言日月初出之時
可以早辨也莊姜賢而文此詩亦備見矣

終風

終風且暴願我則笑誰浪笑教中心是憚終風且霾惠
然肯來莫往莫來慙我思終風且曠不日有曠
不寐願言則嚏嚏其陰飈其雷寤言不寐願言則
懷

名詩之旨鄭氏之說為勝古之名風者多矣未有言
終風者以其僻求之其為不止息之義甚明故為霾
為曠為雷皆以且言之謂其滋甚也以其事求之戴
嬌生桓公莊姜以為已子則桓公非庶子乃嫡子也
嫡子之位宜立非與州吁均為庶子而論其長少也

桓公之立以莊姜之故可以加于州吁者嫡也州吁
弑桓則逼莊姜矣在戴嬀尚薄戴嬀猶不得安于其
位而大婦于陳莊姜送之而燕之之詩作且有泣涕
如雨之辭日月之詩又曰寧不我碩寧不我報其于
母子之睽可勝言哉楊氏猶以母子之道言之亦不
知務矣首章已以譁浪笑傲為言此州吁上燕之意
也二章言靈其晦冥之氣也二章意必浸深惠然肯
來也
乎惠然君有惟然之意故莊姜之之
以冀彼冀來也我方以此感動而思先君也寤言非

晤言也寤寐之中而有言若喪心病風者也嚏則吐
其氣
懷則併與聲不復出矣莊姜之傷悼
如此也

擊鼓

擊鼓其鏜踴躍用兵土國城漕我獨南行從孫子仲平
陳與宋不戒以歸憂心有忡爰居爰處爰喪其馬予以
求之于林之下死生契闊與子成說執子之手與子偕
老予嗟澗兮不戒活兮予嗟洵兮不戒信兮

州吁之伐鄭同惡之情也鄭太叔敗之將聚莊公莊

公克段之子滑奔衛、人為之伐鄭取廩延明年
鄭人伐衛及州吁之弑桓而自立也將脩怨于鄭而
宋公子馮奔鄭、人將納之州吁使告于宋曰君若
伐鄭以除君害君為主敝邑以陳蔡從故宋陳蔡衛
伐鄭圍其東門五日而還序詩者見其有從孫子仲
平陳與宋遂以為詩序而不原其事也諸家作平陳
于宋託于宋而與陳平其于歸義通暢且足以明州
吁之立
但陳之仇怨非宋之伐鄭所能平尔
州吁之立在其秋九月衛殺州吁矣計其用兵首末

四閩月耳傳有弗載自焚之語詩序有用兵暴亂國
人然

詩改之怨在州吁之逆不專以其用
兵之久也其曰踴躍用兵此衆仲所謂以亂者也納
鄭公孫滑而取廩延者桓公也州吁弑桓矣州吁之
脩怨與滑同惡也師本伐鄭詩人乃曰平陳與宋豈
惟蔡不與焉殆是宋本無意于伐鄭而州吁導之以
伐鄭也宋寔用師之主又嘗乞師于魯矣陳媯之娣
生桓公而州吁弑之戴媯已歸于陳終之圖州吁者
陳也是州吁之忌陳而陳之仇州吁寔深宋為師主

聽州吁之言而黨惡者矣州吁之欲自結于宋者尤重故詩人略他國專以陳宋為言序詩者襲其言定不能知其情詩之諱若無怨意特不為州吁用命耳為之將者州吁之黨也踴躍用兵者其好兵之情師出無名國人不與也二章言公子仲連其惡也三章以下王肅謂與其從軍者訣別室家之辭誠若有之契濶二字要未易知以末章于嗟濶兮推之則二字之字若言生死相去之遠濶也不可輕相弃也故下三句云尔洵之訓遠他無可證詩人多以

洵為信室家相悅之情如此而不潯伸者也衛人不
為州
詩具見吳州于之見仇于陳者深交
于宋者淺故詩人以平陳與宋為言

凱風

凱風自南吹彼棘心棘心夭夭母氏劬勞凱風自南吹
彼棘薪母氏聖善我無令人爰有寒泉在浚之下有子
七人母氏勞苦晝昃黃鳥載好其音有子七人莫慰母
心

以詩緯求之莫見其母之不安其室也序詩者例以

衛之淫風言之及末章有莫慰母心之辭遂謂其母
之不能安室也然以事推之一母而鞠七子誠為勞
苦也矣其長育者七人其間豈皆長育哉由是言之
七子皆相若念其母之至勞而為此詩也首章言棘
心次章言棘薪皆以棘為言猶叢棘也艱難之所取
喻也風之育物豈有所擇言艱棘之中有所長育者
之棘心今為薪矣喻其母之勞也寒泉在浚之下者
水經云鄭地為濟水濟行乎地下而有所謂
入于河澼為榮泉又出于浚之下水之行乎地下隱

伏不見人所不知猶母之勞苦今所不見也黃鳥好
音七子自悅其母可以人而不如鳥乎當相與
慰諭其心可也果使母有不安之意豈不幾微見于
言辭哉

雄雉

雄雉于飛泄、其羽戢之懷矣自詒伊阻雄雉于飛下
上其音展矣君子寔勞我心瞻彼日月悠、我思道之
云遶曷云能來百尔君子不知德行不忤不求何用不
臧

雄雉之詩殆不可曉往、序詩者不能知直以衛之
時事演為此辭庶幾于一中尔詩之辭旨皆所未有
也竊詳求之詩以雄為名按潘安仁射雉賦廵丘陵
以經略兮畫墳衍以分畿徐爰注曰雉一界之內以
雄為主餘者雖衆莫敢鳴雉也賦又云標雄妬異儵
來忽往注曰標擊搏也聞他雉鳴擊搏其雌儵忽來
往此賦所謂耿介雄雉也詩人不浪名詩雉特以雄
名蓋物性自有特異者如鴛鴦之不分偶款合詩之
四章求之無淫亂之風而有貞一之旨義以雄雉為

主前三章皆雉雉專一之情未嘗有他志也首章言
雉之求偶如此我懷此志自成阻隔也二章雉求之
切我聞其音思之勞結也三章日月之久不將合偶
以居也卒章則秉志之純凡百君子我皆不知其德
行如何但東此一心內無所忤外無所求則无往不
善矣自勉以堅守也此志少差則自陷于善惡要在
哉此女子屬心于吉士之情若後世崔護覓水之風
之類世自有若此者不可盡非也樂府之有雉朝飛
者蓋男子之事不以雉為義徐爰謂晉渡江後此藝

仍廢訖今寡能其事覽賦莫曉故記所聞此固近代
說詩之所未詳歟

匏有苦葉

匏有苦葉濟有深涉深則厲淺則揭有游濟盈有鷺雉
鳴濟盈不濡軌雉鳴求其牡雝雝、鳴雁旭日始旦士如
婦妻迨冰未泮招、舟子人涉卬否人涉卬否卬須我
友

詩緯專以濟與雝為言而詩名則一語之外無餘緯
殆是專刺夷姜而以罪宣公者重也以雝言者其情

起于夷姜也故以求牡為言詩人之法備矣匏以葉
言不以瓜言時之早也謂宣公之年尚少葉猶苦念
不及于食也言宣公無上烝之理也濟水雖越其度
行于地之上本不可涉也乃宣公不計淺深而涉之
為宣公不能以禮自制所以致衛國之禍敗幾于喪
亡者夷姜寔為罪魁使夷姜以母道自居萬一有似
于莊姜則何由至此宣公不自制以禮固大罪也情
必有所起為匏不食之物孔子曰吾豈匏瓜也哉為
能繫而不食亦此義叔向曰苦匏不材于人供濟而

已韋昭言之甚明首章並言者以匏濟水耳匏未可
濟而急于涉故曰屬楫今則食其葉而忘其苦其上
烝之溺乎此則罪宣公也自此以下罪夷姜也則取
匏葉之義矣又濟之為水行乎地中溢而出乎地之
上水經之所著也禹貢曰導沔水東流為濟入于河
凡水入江河則同流以入海惟濟為四瀆獨至于海
不耐于河故曰入于河行乎河之下溢為滎又行于
地中東出于陶丘北此所以取喻于濟也濟與漢皆
行地之下濟水之性本行地下若盈溢而出于地則

非其分濟以盈言猶禽貢言溢為榮也濟盈溢乎地
之上不安行乎地之中若夷姜是也濟之為盈猶不
至于濡孰令夷姜之愚殆又過之不能自制其聲音
至于求其壯焉夷姜宜出處者也而以色售猶雌雉
不當鳴而鳴也濟而有深淺焉其善于喻夷姜乎宜
公不宜涉也涉而有揭屬焉不擇深淺必涉而已寧
則罪也況後至于濡孰乎孰以道路言猶九軌之路
也惟坎不濡他皆泛濫矣雉之求雌常也鷩之求牡
興矣有鷩雌鳴雉不當鳴而鳴以求牡夷姜不可勝

罪而宣墮其奸矣此誅其情也夷姜之不免于縊天
誅之也詩人盡人之情類如此是二章無餘蘊矣三
四章乃以禮正之雁有別之禽雖、和也言宣公夷
姜之相得也何如從時以行夫婦之禮乎乃若是亂
倫哉舟子之喻亦所以畢涉濟之義再言人涉印否
印之訓我似若無據以招、求之亦若印首之印以
招之切也招之切而人亦涉之否情雖切必得友乃
可與濟須其友則有同焉者矣上煞者未必有與同
者疾之甚也

谷風

習、谷風以陰以雨，勉同心，不宜有怨。采芣苢，無
以下體德音，莫遠及尔，同死行道遲。中心有違，不逮
伊迓。薄送我畿，誰謂荼苦，其甘如薺。宴尔新昏，如兄如
弟。淫以渭濁，洗其耻，宴尔新昏，不我屑以。毋逝我梁，
毋發我笱。我躬不閱，遑恤我後。就其深矣，方之舟之。就
其淺矣，泳之游之。何有何亡，勉求之。凡民有喪，匍匐
救之。不我戢恤，反以我為仇。既阻我德，賈用不售。昔育
恐育鞠，及尔顛覆。既生既育，比予于毒。我有旨蓄，亦以

御冬宴尔新昏以我御窮有洗有潰既貽我肄不念昔者伊余來墜

谷風之為春風習：之為舒和誠莫詰其為不然也然詩之名谷風者二其發語之緯又同其為哀世薄俗夫婦義廢朋友道絕又同安得強以為和舒之時哉此詩六章、八句以其章言之緯有相聯屬者大抵皆四句叶韻其義皆屬緯皆相應今因不敢妄易毛氏章句但不容強相聯屬尔名詩之旨其伏山下有風盪乎風挾萬物者也在山下為盪壞之象谷固

山之回環者也。風之回旋于山谷之中。物之震蕩。枕
亂可見也。此詩序所謂衛人化其上也。宣公之夷姜
上烝之妻也。于宣姜又子伋之妻也。皆不得正其夫
婦之名。宣姜寵而夷姜繼序。詩者遂起此說。爾自古
夫婦多不可以常情言。此詩之諱其妻之賢而見弃
于夫。秉心純一。終不能離世之佳人。命薄類如此。詳
詩之諱。非身嘗之不能道也。首章初婚之時。惟恐違
其怒也。下体不必以諱害意。米其大義。無責小疵之
意。這猶禮記舅姑承子以授。婿恐事之違也。二章遲

下缺三頁

以遠言而相弁矣茶其指斯昏之人乎此必有二要
故以新昏言之但以渭濁程氏之言得之渭本清而
東翟則赫如後起既指斯昏為言宴于彼不屑于此
之三章言人才各有所處如榛之在山苓之在陲
容易地其美人之在樂舞者本宜荐之王朝者也諸
侯得人而荐之天子周雖東遷亦衛之西也明非侯
國所能用也萬舞之人雖賢未必至是持人嘆息其
人美之不嫌其通也

泉水

詩
卷二
必彼泉水亦流于淇有懷于衛靡日不思妻彼諸姬耶
與之謀出宿于泚飲餞于祢女子有行遠父母兄弟問
我諸姑遂及伯姊出宿于干飲餞于言載脂載牽還車
言邁邁騶于衛不瑕有害我思肥泉之永嘆思須與
謂我心悠：駕言出遊以徧我憂

竊詳詩經蓋是以義自斷絕念于父母之國也首章
言泉水之流于淇以泉水自況亦歸于衛國之淇謂
女亦思念其家將與謀之二三章均為遠父母兄弟
而去衛之初也還車之邁騶于衛已將全出遠之義

矣四章思泉水之肥遊者不可復返也永嘆而已思
衛之色心悠、不已無時而可忘但當出遊滿憂而
已非以義自斷乎是必與載馳同音也矣

北門

出自北門憂心殷、終宴且貪莫知我艱已為我天寔
為之謂之何哉王事遄我政事一埤益我、入自外宣
人交徧誨我已為我天寔為之謂之何哉王事敦我政
事一埤遺我、入自外宣人交徧推我已為我天寔為
之謂之何哉

此詩之怨何其事之微而志之深乎詩凡三章已爲
我之下三句皆同其愛：之端既已隱而不發謂人
莫之知惟可也二三王事政事之勞內不能得于室
家乃同歸之于天夫乃室于怨而市于色乎聖人存
之以示萬世必有未易知者此詩當以郭林宗之言
求之其憂漢之亡乃曰吾晝觀人事夜觀天象天之
所廢不可支也何為栖、不違寧處如此其言簡直
易見詩妙幽微難明也且以北門名詩其發語曰出
自北門憂心殷、貧窶矣微子去殷之心也宜室人

之不知也王事猶直視人事也政事猶夜視天象也
室人交謫猶栖、不遑寧處也故皆以己爲我之俾
自斷而接之于天烏賢者憂世之心其切如此

北風

北風其涼雨雪其雩惠而好我攜手同行其虛其邪既
亟只且北風其皆雨雪其霏惠而好我攜手同歸其虛
其邪既亟只且莫赤匪狐莫黑匪雉惠而好我攜手同
車其虛其邪既亟只且

詩以爲虛莫可知也以雨雪之轉言之耳然以爲歲

暮時感國家將亡之兆亦可但威虐之政他所不可
知危亡則信矣同行同歸同車此同舟遇風之意其
疑碑也其可以虛徐乎勢既急矣是亦見幾者也

靜女

靜女其姝俟我于城隅愛而不見搔首踟躕靜女其婁
貽我彤管彤管有輝說懌女美自收婦莫徇美且異匪
女之為美：人之貽

此詩似不可臆為之說缺疑可也姑以詩名詩碑近
似者言之以俟知經者可也以靜女名詩其必有靜

專之德可以言而不可即者乎首章佚而不見固不
負名詩之義矣二章所貽者彤管其將以禮法自守
不可越也此靜女之所以為美也三章再申言其美
者信其為美也自收歸美若女子所歸之路：已美
矣非後佚我不見而已絕而不來久矣此其為美且
異也非以此為女之美也美其所以貽我彤管果能
以禮法自持如此也此所以為靜一也然而此詩乃
曰佚曰貽猶有接焉何也有所接而能堅確自固所
以為靜與德也女雖深處苟非大家亦有不接不接

者爲西晉郝夫人因汲水無旁視而王導納之爲婦者也

新臺

新臺有洧河水沚、燕婉之求、遯蔭不鮮、新臺有洧河水沚、燕婉之求、遯蔭不鮮、魚網之設、鴈則離之、燕婉之求、得此威施

以詩之三章推之前二章不鮮不珍疾宣公也遯蔭之人已不鮮不珍謂既老且病而不死也于時宣姜固有求伋子之心非若他日之構伋子也末章宣公

已有以得宜姜鳩雖于網不復有伋子矣由是推之
孔氏所謂未至術而要之者似若有之焉魚網之設
與燕婉之求皆初要伋子之辭也河水雖感興而言
亦國人思所以流其思之意

二子乘舟

二子乘舟汎、其景願言思子中心養、二子乘舟汎
汎其逝願言思子不暇有害

伋子爭死亦已奇矣傳之外唯此時尔不得與中生
同晉獻可以言而不言衛宣不可以言者也皆可以

無死、傷勇矣、及不得為孝、壽不得為弟者、所害者
大也。詩人以乘舟為言者、及以妻故、壽何為哉。疾、宣
公之甚也。謂二子所遭不同、而俱為宣公子、將陷溺
于巨浸之中、無畔岸矣。是則可哀也。明二子所以死
之心也。國家之禍如此、去將何所之乎。首章汎、其
景二章汎、其逝矣。國人皆言其不可思也、及不逃
父之命、壽不陷兄于死、雖無小瑕、而有大事矣。

鄘風

柏舟

汎彼栢舟在彼中河斃彼兩髦寔維我儀之死矢靡他
母也天只不諒人只汎彼栢舟在彼河側斃彼兩髦寔
維我時之死矢靡慝母也天只不諒人只

名詩此邠周而義與邠異者栢舟之在河也舟未有
無水而可行者明舟之不可出乎河也猶女之不可
出乎夫家也之死者猶言至死也失信也慝過也母
憂其節之難全慮其有失故以死自誓而謂其母之
不傷乎人也故誓言之栢之為木堅久者也般人以
為杜有美質者也

詩
卷二
牆有茨

牆有茨不可掃也中冓之言不可道也所可道也言之
醜也牆有茨不可束也中冓之言不可詳也所可詳也
言之喪也牆有茨不可束也中冓之言不可讀也所可
讀也言之辱也

名詩之音如毛氏反傷牆之說固善似亦未暢以其
言之不可而不言于牆茨何與乎似是踰牆相從之
意故有取于牆書垣墉墜茨若探扁重門之意也詩
人謂人之居室所以爲此者備盜也猶說難謂不耳

將有盜是也。今之公子頗乃自居中弄而亂其室盜不自外至。牆茨皆無用也。詩人疾之謂牆之上加茨烏可盡去也。中弄之言其所不可形言者人盡知之何以牆爲。又何以茨爲。所以然者宣姜本爲伋妻而從于其父。又與宣公構伋子而殺之。醜也甚矣。迨宣公子死。朔爲君。又通于公子頗而生五子。宣淫于天下。五子又皆閑于一世。則中弄之言尚可掩乎。此詩人所以歎掃除而托牆茨以爲諱也。不可道猶女之晚兮不可說也。

君子偕老

君子偕老副笄六珈委、佗、如山如河象服是宜子
之不淑云如之何玼兮玼兮其之翟也鬢髮如雲不屑
髦也玉之瑱也象之拂也揚且之皙也胡然而天也胡
然而帝也瑳兮瑳兮其之展也蒙彼綢繻是絺綌也子
之清揚、且之顏也展如之人兮邦之媛也

說此詩者若謂宣姜宜與宣公偕老也以其事致之
則似不然州吁弑桓公自立石碯使陳討其罪名公
子晉于邢立之是為宣公宣公豈得未婚乎其上燕

于夷姜且生伋子又公為伋娶于齊而夷宣公要之
是為宣姜計其年齒公固宜長于姜三十餘年矣又
非夷姜之比不特以大婦言相期于偕老也詩人以
偕老名詩為宣公寘姜之齒相遠之甚也以詩婢致
之則信以姜之鬢髮而配公之髭也夫一老一少不
相等如此詩人謂夫婦之道當如初昏之時偕夫人
之礼服故曰象服是宜可也今也老穉不相等可謂
不淑矣云當如何哉二章復言榆翟之盛鬢髮之宜
而公之須眉已白而可以為大為帝乎三章言子之

清揚頗宜過于暫矣展如之人指宣姜誠為國色故
宣公卒公子頑烝之而生五子計其當宣公卒之年
纔三十歲也詩所謂服飾之盛皆夫人之服也委
佗、似若夫人宜此服非謂人君之德也

桑中

爰采唐矣沫之鄉矣云誰之思美孟姜矣期我乎桑中
要我乎上官送我乎淇之上矣爰采麥矣沫之北矣云
誰之思美孟弋矣期我乎桑中要我乎上官送我乎淇
之上矣爰采葑矣沫之東矣云誰之思美孟庸矣期我

乎桑中要我乎上宮送我乎淇之上矣

詩章之同辭者多矣未有以中間一辭名詩者以前三句為名者有矣此詩前四句之義皆無取焉後世之言淫奔者必以此詩為首談鄭衛之音莫先于此其為變風未有加焉何也墻有茨至于不可形言乃不以為先此詩章七句其言采與思者皆男子也言要送者女子也男子之情未有無故而能通者必女子先為故強暴不加于貞女若善學柳下惠則男子之奇是也故此詩以桑中為名始于女子者持人之

微旨也秋胡採桑婦也而為百世稱者為文王之化
以形于婦人女子者為極至亂世之風必自淫奔始
也是詩首章以姜為言姜齊世也按衛宣姜與魯文
姜皆齊女皆隱桓之世時不詳宣姜果為齊僖公之
女乎文姜之惡書于春秋甚詳宣姜之惡尤詳于詩
魯之禍薄于衛者衛國之人化之甚也

鵲之奔、

鵲之奔、鵲之疆、人之無良我以為兄鵲之疆、鵲
之奔、人之無良我以為君

詩以二禽為比其詳其孰為宣姜孰為公子頑也詩人必有所指以其句讀言之豈二禽之相為配偶乎觀羽族之尊尾未嘗不從其類鵲未必果與鵲合詩人喻其非類耳猶宣姜之與公子頑也罪宣姜之甚故以名詩惡姜之靡也召南亦以鳩鵲興文王大臣二禽亦未嘗雜處其巢詩人之言自有其主不可以此言宣姜首悖其夫惠子而從宣公中又端而後之終又為公子頑之宣姜五子而以衛武公之聖一再傳而亡其國一婦人之患也其禍與陳夏姬相若已

事之鑑安可枚數哉

定之方中

定之方中作于楚宮揆之以日作于楚室樹之榛栗椅
桐梓漆爰伐琴瑟升彼虛矣以望楚矣望楚與堂景山
與京降觀于桑卜云其吉終焉允臧靈雨既零命彼倌
人星言夙駕稅于桑田匪直也人秉心塞淵昧兆三千
衛自康叔至于莊公四百餘年未嘗有變故一揚于
宣公之淫洩宣姜又無人道宣公在位十八九年思
公首末出入三十年公子頑在中冓時也見閔公二

年齊人強昭伯以熬宣姜狄遂滅衛一宣姜之爲衛
患如此齊威公之立戴公不踰年而卒遂立文公自
徙楚丘至于城楚丘三年之間新立之國已數殷富
隳北三十雖美之、緯未必其寔而元年三十束季
年三百束則其寔矣按衛宣公在位與齊僖公齊命
于蒲矣又嘗與齊鄭宋盟于愚曹矣又嘗入鄭伐鄭
盟瓦屋伐盟向戰郎其所以立國者未過于弱也其
子惠公不能定其位懿公立八年而見殺于狄非有
齊威衛遂亡矣由是言之、一宣姜之禍淫亂于內雖

有他善不救于亡然後知正身正家之道不可不謹
如此一宣姜之無道風俗大壞衛幾胥而為夷一文
公之主國三年而通其舊聖人備著其事使後之為
國者知致亂如此之易致治亦如此其速衛之國風
豈徒列其淫佚不為之掩哉聖人獨以三衛繼二南
示萬世人主以齊家治天下之軌範如此其昭也
詩僅百餘言耳而經營制度農桑事物無一不具而
理義之微德業之粹獨于卒章盡之詩以定之方中
名詩者記其建國之時于農隙而用民力也一詩之

旨蓋在塞淵二碑衛文公之盛德不待單述也矣人
主之為善惡不造乎極至則已苟有造焉其所感移
豈容以常情計量也哉然齊威成宣姜之惡使至亡
衛而後封之亦總小功之祭也斯所謂薄德歟

蝦蟇

蝦蟇在東莫之敢指女子有行遠父母兄弟朝隣于西
黨朝其兩女子有行遠兄弟父母乃如之人也懷昏姻
也大無信也不知命也

此詩三章前二章女子有行之諱皆同但協韻少異

耳後一章通為疾惡其人安得強生分別而為陰陽
逆順之論以其緯推之蝦蟆朝隣均為虹故皆以女
子之行為緯然女子有行遠父母兄弟與泉水竹竿
雖同二詩皆女子念其家也此詩則不然詩人似若
疾女子如孟子謂踰牆相從則父母國人皆賤之者
也此猶春秋美惡不嫌同緯詩之疾淫奔若謂女子
專恣而行不恤其有父母兄弟者也以其取喻驗之
可見虹為陰類因太陽斜光而見故晚則在東詩之
首章謂其情之不可指言也此淫奔之始也固已甚

矣朝隣于西則尚早也本以止雨而為霽崇朝其雨
則不可禁止者也荀章言男女已將失時故以晚為
喻若朝隣則男女之年尚少也已不可禁止故卒章
疾之甚

相鼠

相鼠有皮人而無儀人而無儀不死何為相鼠有齒人
而無止人而無止不死何俟相鼠有體人而無禮人而
無禮何不遘死

此詩至易曉而有難知者人但以無禮若世俗常談

耳則亦疾之已甚也切詳詩緯以皮齒体取喻何必
鼠哉鼠晝伏而夜動畏人者也又與人同處近于人
也儀匹也首章已疾其無匹又宣淫不止卒章言無
禮殆無上下此幼之節以陵節為可安者也此喻公
子頑之淫宣姜者乎不然何患之甚至欲其並死以
無污辱人道也

干旄

子：干旄在浚之郊素絲紃之良馬四之彼姝者子何
以昇之子：干旄在浚之郊素絲組之良馬五之彼姝

者子何以予之予、干旌在後之域素然祝之良焉六
之彼妹者子何以告之

此詩大抵難知諸儒雖多爲之說要之不能不窒姑
言其可知者自定之方中之後亦均之爲刺皆危亡
之事獨此詩問其間爲盛美之詩若衛武公之時何
不相等如此哉定之方中先儒謂淫亂者必亡其國
其勸戒誠深光之方中之後國人化其風者也此詩
乃國人美之何哉切意此詩亦刺也刺其卿大夫序
取爵秩而不可與爲善也昔韋白郊而顛用之凡詩

人加彼之一絳者皆外之也猶聖人謂彼哉彼哉者
也彼之居此位者信矣矣猶所謂彼以爲天下之美
盡在已何可與之爲善乎卒章併不可得而告語矣
以此推之皆通

載馳

載馳載驅歸唁衛侯驅馬悠悠言至于漕大夫跋涉我
心則憂既不我嘉不能旋反視尔不臧我思不遠既不
我嘉不能旋濟視尔不臧我思不閔陟彼阿丘言采其
芣女子善懷亦各有行許人尤之衆穉且狂我行其野

芄：其麥稼于大邦誰因誰極大夫君子無我有尤百
尔所思不如我所之

說此詩者當觀古人于國事皆與民庶同之雖夫人
之歸國人皆得而制焉不必其臣下敢言其非也許
穆夫人齊女宣姜之所生也國人以宣姜之宣淫為
世大醜故于夫人敢得而尤也此許人之情也夫人
之不得遂其志固知屈于國人無以伸其大義矣然
聖人所以錄許詩于鄘之末者國有善之大者當衛
之亡或狄方強視周大或之禍未遠當時諸侯未知

所以救衛者夫人齊之出也可以控告于齊、有桓
公之方伯夫人蓋知其足以存衛也故于末章言許
之諸臣無以我為尤雖百尔所思不若我之所主在
齊必能存衛以安諸夏也言非齊則許亦不能保矣
此詩之所以可錄欽按左氏傳閔公二年齊之威公
至是已伯中夏二十餘年矣初齊人又嘗使公子頑
然于宣姜而生五子衛文公其次也文公為衛之多
惠而先遣齊矣齊侯使公子無虧戍曹亦以夫人賦
此詩之故是衛之後興亦此詩之力居多尔故曰桓

于大邦誰因誰極明非他人所能興也夫人之特見
當時臣民豈所可及乎固宜斥以無知之稱易言之
狂也

衡風

淇奥

瞻彼淇奥綠竹猗猗有匪君子如切如磋如琢如磨瑟
兮僊兮赫兮噤兮有匪君子終不可緩兮瞻彼淇奥綠
竹青青有匪君子充耳琇瑩會弁如星瑟兮僊兮赫兮
噤兮有匪君子終不可緩兮瞻彼淇奥綠竹如簣有匪

君子如金如錫如圭如璧寬兮綽兮
積重較兮善戲謔兮不為虐兮

名詩以洪興者義不在洪也衛詩多以洪為言雖桑中之大惡亦曰送我乎洪之上蓋以洪為興衛地之水也是詩名以洪興義在于興洪何興哉興之義何也雖莫詳其義之的以意逆之豈水之防岬歟此其所以取喻也岬詩曰洪則有岬是也自古至聖大賢非如後世儒者所謂備道全美也惟其深自敬畏以納于法度準繩之中如吾夫子七十從心所欲而不

瑜矩文王小心翼翼：是也故舜于執中之後猶曰無
稽之言勿聽語顏子以四代禮樂猶曰放鄭聲遠佞
人此武公所謂無以我老楚而舍我之意抑詩所謂
惟德之隅者也與之義即德之隅也若大學所衍之
義似若吾夫子因此詩以發新義詩意若非有道學
自脩之異衛人所謂睿聖武公是誠有大過人者焉
然首章與二章既個以下同諱每章同諱者多矣獨
兩章同諱者甚寡蓋切瑳者述德之原也瑑瑑會升
者稱德之服也故嘆美之諱皆同單于並璧金錫成

德已脩矣故以別義發之特重較之旨不可知似若
謂其待人之厚如此繼以戲謔之辭此旨必深切意
武公盛德至善若此矣宜其巍然不可即也至其待
人接物曾無等衰之異大凡人之品級不同惟至下
者有近之不遜遠之則怨之患聖賢處此有張弛焉
善用其詭不至于廢其節人、以為與我厚此尤人
所難能也故詩人以此為武公全德之至欣重較如
呂和叔之說可也切瑳琢磨本若一義妄意聖人若
謂治骨象之法受斤斧者燠其工易如其順易移故

曰道學也治玉石之法堅密而難攻歲月磨礪不容
速成故曰自脩也武公以道學成其廣矣又積漸以
琢磨之二者兩全而内外交養所以養成于悠久之
後而人心自不能忘乎詩以綠竹為喻三章各異者
詩旨所寓也猗、似是茂盛之貌德之始也青、則
已有蒼、之幹德之成也如箬則達之于用人藉以
為安德之終也詩人圓無虛詞非可略也

李西岸曲為限其渠水之出也出衛州共城北山
左昭公二年北宮文子賦渠與字從水之與字通

用也毛氏以爲綠王翦竹蕭竹也陸氏以爲草與
終朝采綠同蓋本尔雅也李謂前漢辛武賢下洪
園之竹寇恂傳曰伐洪園之竹以爲矢是其水有
竹明矣有匪論語所謂斐然成章大學亦用斐字
個荀子曰陋者俄且個爲寬大之文也金錫圭璧
者盛德之至有剛有柔其化無方或銳或圓其成
不易其化無方所以爲道其成不易所以爲義戲
謔如前言戲之耳之戲不爲過也

考槃

考槃在澗碩人之寬獨寐寤言永矢弗緩考槃在阿碩人之邁獨寐寤歌永矢弗過考槃在陸碩人之軸獨寐寤宿永矢弗告

以槃為樂成槃樂之志殊不可知詳思之槃與盤同自古所謂盤義者惟隱者得而用之他莫之敢居也始于易之屯初九盤桓居貞歸去來胡曰撫孤松而盤桓李愿盤谷曰隱者之所盤唐人之詩曰朝日上園、照見先生槃、中何所有首霜長鬢千下而田野上而庙朝未有用盤義者也如傳所謂盤樂者亦

盤旋矣于樂而不止者也夫以澗水之旁山阿之上
平陸之地而碩大之人居之非隱者而誰乎碩大之
人宜在朝在位可也今乃在此山林平曠間而乃寬
大從容隱者無所事乎世故于物所以盤旋而無勤
勞歆憚之態是以取此為義古今不謀而同然者也
惟賢人之隱無預乎斯世則能成其隱逸之事此名
詩之義歟惟其然也是以首章為言、獨自言也如
寢不言之類二章為歌三章為宿既安于肥遯故始
于在澗在阿至在道路而從行役亦不以輕告人者

何也隱者之在山常也若飢餓不濟而安于山谷或
出而遊于世不使世人得而知所以自謀其生至于
在路也近世白雲郭氏隱于三峽每歲常一至荊州
市竹木取衣用而歸其大隱朝市乎遊于世而人莫
之知故曰弗告也詩人要有自然之旨非可強以善
意附益之也歆畝不忘君雖君子忠誠盛德于此詩
則未必然過焉者以為不忘君不及焉者以為誓不
復入朝何相遠哉要是避色避言避世之意不容窺
測者也寐以獨為文則寤亦獨也寤寐之間心獨自

姜尊、庶士有竭

莊姜齊女也其賢聞天下莊公之溺于所嬖不可以
常理言國人陳盛其君母之色夫乃未宜乎以色為
事非妃后之道也明莊公之惑出于人情之外明莊
姜能以其色自責而以德居之此其為不可及歟詩
人謂色與德與勢皆足以重于衛國脩陳而詳述之
盡在此矣莊公卒使無子而嬖者進焉莊姜之賢愈
著莊公之惑愈明不然詩人何為貽、我特有一婢
難曉大夫風退無使君勞此義終有礙豈君之視朝

羣臣朝于外其退朝也后妃以翟褕朝于內方翟第
以朝之時謂君在外朝治國事使大夫且風退此豈
賢妃輔佐君子之道詩人之旨必有大焉者此詩蓋
國人美莊姜之賢疾莊公之感也國人謂大夫與君
共治國事者也猶當風退以無虧內朝之儀而嬖人
乃專寵至于奪君夫人之位可乎此微而婉詩人感
動之旨亦深切矣此詩無素以為絢一句而論語注
以為逸以子夏之問言之非逸也以起于雅之似若
指此句為可刪故聖人謂之起予也由是言之此句

為刪明矣卒章似指莊公蕩：之德洋、活、也故
魚貫而進者如此之盛庶姜孽、則為孽者衆庶士
有禍在朝之臣亦無所容其力也此章皆為比也河
水皆喻莊姜之寬大施界喻莊公綢羅姬侍如鯉鮪
之衆積累如此所以遭尊而臣下莫之救乎

氓

氓之蚩、抱布貿絲匪來貿絲來即我謀送子涉淇至
于頓丘匪我愆期子無良媒將子無怒秋以為期乘彼
塊塤以望復關不見復關泣涕漣漣、既見復關載笑載

言尔卜尔筮体無咎言以尔車來以我賄遷桑之未落
其葉沃若于嗟鳩兮無食桑葢于嗟女兮無與士耽士
之耽兮猶可說也女之耽兮不可說也桑之落矣其黃
而陨自我徂尔三歲食貧洪水湯湯漸車惟裳女也不
與士戒其行士也罔極二三其德三歲為婦靡室勞矣
夙興夜寐靡有朝矣言既遂矣至于暴矣兄弟不知嗟
其笑矣靜言思之躬自悼矣及尔偕老使我怨洪則
有岵隄則有泚總角之宴言笑晏晏信誓旦旦不思其
反、是不思亦已焉哉

是詩始末皆女子之詞而以男子為名者怨詞也怨而不改其度執心之壹矣然始不以正不由媒妁之言而至于奔此固不足以持男子之心于不変後世衰薄喪節多在女子衡之所未亡者其風未為甚靡也若谷風則震蕩矣鳴有婦道存焉反者謂初意相得而謂其不然也不忍其不然而追咎于始之不善固當自斷于無望也矣此猶喪風之善者歟

竹竿

籊籊竹竿以釣于淇豈不尔思遠異致之泉源在左淇

水在右女子有行遠兄弟父母洪水在右泉源在左笑
巧之璫佩玉之儺淇水悠：檜楫松舟駕言出遊以寓
我憂

此詩有難知者序詩者但見有遠莫致之又曰遠兄
弟父母遂謂其遠他國若果遠他國豈得有從洪水
寓憂之詞此非思想之詞也詩之四章辭意不出乎
淇泉二水之外則是未嘗遠他國也有所思而不將
遂當淫奔之時而能自制其奔蕩之情是不溺于習
俗聖人以是為可錄也鈞洪而有所思制于勢而不

得行其遠非果遠也泉水亦衛地邶風有泉水者亦
衛風也泉洪二水常限制而不得越也女子遠兄弟
父母謂女宜有所歸巧笑之堪女子事也佩玉之儺
男子事也不埒而偕也想望之而已尔故卒章以悠
悠自斷徒以銷憂而已衛詩無甚靡之風聖人所以
別于邶鄘者乎伯兮有狐之首皆與是詩不大相遠
聖人以其近于正而不淪于邶鄘之度風是以錄之
以明康叔之遺化

芄蘭

芄蘭之支童子佩鵠雖則佩鵠能不戢知容兮遂兮
帶將兮芄蘭之葉童子佩綦雖則佩綦能不戢甲容兮
遂兮垂帶將兮

詩之刺惠公則有矣驕而無禮何在哉以國君之尊
雖曰年幼而以童子斥之尚謂其驕如鄭氏所謂
柔弱蔓延則困惠公之廢然也強則能驕弱則弛矣
按左傳惠公之即位也少齊人使昭伯公子頊上烝
于宣姜而生五子既立及四年矣二公子立黔牟而
惠公奔齊越六年齊伐衛納惠公惠公弱則通矣不

能驕也詩人之詞謂以童子而服成人之服雖則服之誰不知其為童子而狎之乎容兮遂兮齒帶悸兮謂不稱其服也故其詩曰雖則佩鵲佩綵人不以其佩而尊之也

河廣

誰謂河廣一苇杭之誰謂宋遠跂予望之誰謂河廣曾不容刀誰謂宋遠曾不崇朝

伯兮

伯兮朅兮邦之桀兮伯也執殳為王前驅自伯之東首

如飛蓬豈無膏沐雖遠為容其兩其兩果、出日願言
思伯甘言首疾焉得緩草言樹之背願言思伯使我心
瘳

詩意若思其君子其辭旨近于正幾若衛正風未嘗
有怨懟之意是以錄而不必過求者也孰足未為賤
事能衛上者也衛上忠也宦家思其夫以正聖人以
其近正不以膏沐為容甘心于憂且病乃不得列于
碩人之次然他亦未有指所天為伯之例善惡相遠
如此宜缺以卒章求之若女子思其兄之辭若以伯

為兄也卒章又不通矣

有狐

有狐綏：在彼淇梁心之憂兮之子無裳有狐綏：在彼淇厲心之憂矣之子無帶有狐綏：在彼淇側心之憂矣之子無服

詩意殆不可識曾不見故礼多昏之意以例求之齊風南山序謂刺襄公淫乎其妹詩亦曰雄狐綏：此詩曰有狐又曰在彼者來相及也狐多疑之物易謂濟與否也隔于淇則不得濟三章言其憂言其張自

制其情如此邠鄘多淫衛則木豆于廟也詩序大抵同之說者強以序釋之矣

木瓜

投我以木瓜報之以瓊琚匪報也永以為好也投我以木桃報之以瓊瑶匪報也永以為好也投我以木李報之以瓊玖匪報也永以為好也

按左傳戴公文公皆衛宣姜所生宣姜齊女齊人嘗以惠公之弱使昭伯燕于宣姜齊之妃愛宣姜甚矣及狄滅衛而許穆夫人賦載馳驅威公遂戍衛而卒

封之此齊衛以所厚也詩序歆辱報之似得詩意矣
而莫能盡其旨閔公二年且衛已亡齊桓公城楚丘
以立賢君國以復興可謂有大造于衛：何以報此
德哉是非施之輕而報之重也詩乃以木瓜喻齊璵
玖自喻夫乃相遠絕乎說詩者所宜思也詩意政以
衛不足以報此德而去救以甚賤而報以甚貴常也
施以甚重不能報矣衛豈能報齊哉齊大國而又有
大造于衛以玉為所報之物可也明殺重于物百倍
則無以報矣明衛之不足以報也故皆曰匪報也報

增補
之以是心耳始書木瓜而後至于木李亦微寓齊桓
公德意之薄此存三亡國以屬諸侯義士猶曰薄德
者豈以聖賢之事望桓公哉當狄入衛入邢之時桓
公伯業已大不敢輕用其師待其既滅之後迂而封
之固不足補所亡春秋不以此責齊威者待之者固
薄也

詩說卷第二